

URDHËR
Nr. 360, datë 5.9.2013

PËR MËNYRËN E NJOFTIMIT ELEKTRONIK TË AKTEVE GJYQËSORE

Në mbështetje të nenit 102 pika 4 e Kushtetutës, të nenit 7 pika 2 të ligjit nr. 8678, datë 14.5.2001 “Për organizimin dhe funksionimin e Ministrisë së Drejtësisë”, të ndryshuar, si dhe nenit 141 të ligjit nr. 8116, datë 29.3.1996 “Kodi i Procedurës Civile i Republikës së Shqipërisë”, të ndryshuar,

URDHËROJ:

1. Njoftimi elektronik, si një ndër mënyrat e njoftimit të akteve gjyqësore bëhet nga nëpunësi gjyqësor nëpërmjet mjeteve të komunikimit elektronik dhe ndiqet nga gjyqtari ose kryetari i trupit gjykues të çështjes, i cili kontrollon dhe kujdeset për procesin e zhvillimit të tij në përputhje me rregullat e parashikuara në Kodin e Procedurës Civile.

2. Thirrja në gjykatë, nëpërmjet lëtrëthirrjes, urdhërohet të bëhet nëpërmjet njoftimit me mjete të komunikimit elektronik, në rast se çmohet e dobishme nga gjykata dhe kur pala ka dhënë pëlqimin paraprak, sipas rregullave të parashikuara në Kodin e Procedurës Civile.

3. Njoftimi elektronik bëhet me mjete të komunikimit elektronik që mundësojnë marrjen e konfirmimit për mbërritjen/marrjen e njoftimit ose nëse kjo është e pamundur personi i thirrur duhet të konfirmojë personalisht që ka marrë njoftimin.

4. Njoftimi elektronik i paditësit ose përfaqësuesit të tij, bëhet vetëm në rastin kur në kërkesëpadi janë paraqitur të dhënat elektronike të kontaktit, si dhe deklarata e pranimit të njoftimit me mjete të komunikimit elektronik.

5. Në rast se vërtetohet nga nëpunësi gjyqësor se paditësi ose përfaqësuesi i tij ka ndryshuar të dhënat elektronike të kontaktit të tij dhe gjykata nuk është njoftuar për të dhënat e reja elektronike të kontaktit të tij, në përputhje me detyrimin ligjor të parashikuar në nenin 158/a të Kodit të Procedurës Civile, njoftimi bëhet në formë shkresore në një kohë sa më të shpejtë. Në rast se edhe të dhënat e adresës së paditësit ose përfaqësuesit të tij, kanë ndryshuar dhe gjykata edhe në këtë rast nuk është njoftuar nga paditësi ose përfaqësuesi i tij për adresën e re, në kushtet e mosrespektimit të detyrimit për njoftimin e të dhënave të reja nga paditësi, pretendimet e tij lidhur me pavlefshmërinë e njoftimit do të konsiderohen të papranueshme.

6. Për njoftimin e vendimit të gjykatës ndiqen të njëjtat rregulla, të parashikuara në pikat 1, 2, 3, 4 dhe 5 të këtij urdhri.

7. Në çdo rast, njoftimi bëhet duke respektuar legjislacionin për komunikimet elektronike dhe mbrojtjen e të dhënave personale.

8. Njoftimi pasqyrohet në një procesverbal të posaçëm, i cili hartohet dhe përmban elementet e parashikuara në nenin 141 të Kodit të Procedurës Civile, si dhe bëhet pjesë e dosjes gjyqësore.

9. Për arkivimin dhe ruajtjen e procesverbalit të njoftimit ndiqen të njëjtat rregulla si për ruajtjen dhe arkivimin e procesverbalit të seancës gjyqësore të mbajtur në formën e një përmbledhjeje me shtypshkrim apo dorëshkrim.

10. Ngarkohen gjykatat e shkallës së parë dhe gjykatat e apelit për zbatimin e këtij urdhri.

11. Ngarkohet Drejtoria e Përgjithshme e Çështjeve të Drejtësisë në Ministrinë e Drejtësisë për ndjekjen e zbatimit të këtij urdhri.

12. Ngarkohet Sekretari i Përgjithshëm për njoftimin e këtij urdhri.

Ky urdhër hyn në fuqi menjëherë dhe botohet në Fletoren Zyrtare.

MINISTRI I DREJTËSISË
Eduard Halimi